



schottedichter

Die Premium Wageclique

Fasnacht 2025

WAGGIS: HESCH MIR E UFGUSS?!

Syt Joore gsehsch uns Saunadichter trainiere,
nur so chönne mir au präsentiere
diä schlanke Körper – so wunderbar
und emene gesunde Geischt, das isch jo klar.

Ranze-Kritik löhn mir nid uf uns sitze,
nei sofort gohts denn ab zum Schwitze,
gäll Peter, statt ständig nur no intrigiere,
settsch au du gscheiter ins Aqua go sauniere.

Dört unde denn ganz ohni Hohn,
si mir sau nah dra an dr Perfektion,
für d'Ufguss-WM wänn mir uns qualifiziere
um Prattele fascht blutt z'repräsentiere.

S goot dört nid ums ume bäädele,
nei technisch perfekt settsch chönne wädele,
mit em richtige Tüechli lauft denn ringer,
fascht wie ne schottische Fahneschwinger.

Dr Udo Jürgens-Bademantel ghört au drzueh
und natürlich au diä passende Schueh,
in dene si mir ganz ganz Nätti –
und fascht so schön wie s'Adilette-Käthi.

Wän dir vo däm Gsundheitswahn au profitiere?
Denn löhnd uns doch e feine Tropfe serviere,
stilächt im Chüübel aber trinked nit z'gittig,
sunscht bechömmed dr morn denn allwe d'Quittig.

«Waggis: Hesch mir e Ufguss?!» oder au zwei,
so chömme mir alli chuum meh hei
und mir Dichter nachere Wuche Fasnacht mache,
hän bim useschwitze nüt meh z'lache.

Apropos WM – s hett gliich nid ganz glängt,
sprich am Schluss unsi Möglichkeit gsprängt,
aber mir sin do gar nid ranzig,
mir trainiere wyter – jetzt halt für's 2028.

Spötischtens denn – dasch nid zum Lache,
wänn si d'Sauna WM in Prattele mache,
wo isch au klar – mir riefe luut «che bella»,
im Aqua Basil... oder ächt Bredella?

PS:

Dä Dubel wo d'Vitrine demoliert,
hätt gschieder zerscht sauniert und denn studiert,
jä nu – offesichtlich spinne,
nid nur d'Schotte oder d'Finne...

